

DEDICATIO

sondern auch eines jeden theils desselben/ als eines Lands/ felts/
Bergs/ Thurns/ Statt/ Schlosses/ Brunnes oder Flusses/ wie
auch Matte oder Landtschafft zu erkündigen vnd zu erfahren/ wo
diese Kunst von den alten nicht erfunden vnd in esse wehret Wie
könten an einander gränzenden Nachbarwren/ sie seyen König/
Fürsten/ Gräffen/ von Adel/ Städtten/ vnd andern Bürgern/
so die ein andern vber die Marchstein zu nahe eingreissen wolten:
Ihre Gränzen vnd was ihnen zuständig besser schlichten/ ver-
tragen vnd erkennen/ dann eben durch hülff der löblichen Geo-
metry? Und eben auch daher die Egyptier durch diese Kunst der
Geometry ihre äcker vnd Felder jährlich unter sich getheilet ha-
ben/ vnd sedurch einem jeden sein theil folgen lassen/ vnd das aus
vrsach / daß der grosse vnd wasserreiche Fluß Nilus dasselbig
Land jährlich mit grund vnd zehnlettigten Rots überschütt vnd
alle Gräben vnd Marchen verschwembt hatt / also / daß da-
mann noch heutiges Tags solcher massen in gespan vnd zwis-
tracht kömpt: kan man bald mit geringer arbeit durch diese Kunst
ohne grossen kosten zu ruhe fried vnd eynigkeit kommen/ vnd kan
auch auff keine andere form/ weiz vnd weg eigentlicher vñ gründ-
licher abgetheilet werden. Es dienet aber die hochlöbliche Kunst
nicht allein schlechte zum abmessen/ vnd Marchsteinen zu unter-
scheiden/ sondern dienet dieselbe mechtig vnd wol zu Kriegsstreit-
ten/ mechtigen Potentaten/ General und FeldObersten / Ad-
miralen vnd andern Capitainen: Dann wie könnte doch ein mech-
tiger Potentat/oder mechtige Republica vnd Freystatt/ durch
ihren Obersten/ vnd Capitainen gegen seinen Feinde eine rechte
schaffene Schlachtordnung anordnen/ wann sie der grosse deß
Platzes nicht kündig/da er solche mit grossen vnd kleinen Squa-
dronen von Reuteren vnd Fußvolck anordnen/ vnd dem Feind
ins Gesicht stellen wollen/ wenn er dieses erstes theils der Geo-
metry/ nemlich der Planimetriæ oder Feldmessung nicht ent-
weder selbst erfahren/ oder solche Kunst erfahrne Leuth bey sich
hat?

Wie wil doch ein Quartier Meister an unterschiedlichen
fürfallenden orthen ein Lager anordnen vnd abstechen lassen/
vnd sonst auffs Papier bringen/ vnd seinen Feldherren oder Ge-
neral Obersten zu berahtschlägen fürlegen/ wann er/oder seine
Mitgesellen dieser Kunst nicht erfahrne Leut seynd?

):(iii Wie